

TITAH
KEBAWAH DULI YANG MAHA MULIA PADUKA SERI BAGINDA
SULTAN HAJI HASSANAL BOLKIAH MU'IZZADDIN WADDAULAH IBNI
AL-MARHUM SULTAN HAJI OMAR 'ALI SAIFUDDIEN SA'ADUL KHAIRI WADDIEN,
SULTAN DAN YANG DI-PERTUAN NEGARA BRUNEI DARUSSALAM

SEMPENA
UPACARA SOVEREIGN'S PARADE
PENGAMBILAN KE SEMBILAN BELAS
SEKOLAH PEGAWAI KADET,
AKADEMI PERTAHANAN
ANGKATAN BERSENJATA DIRAJA BRUNEI

PADA HARI KHAMIS
7 JAMADILAKHIR 1442 / 21 JANUARI 2021

BERTEMPAT
PADANG KAWAD AKADEMI PERTAHANAN

Assalamu'alaikum Warahmatullahi Wabarakatuh

Bismillaahir Rahmaanir Raheem

Alhamdulillah Rabbil 'Alameen, Wabihiee Nasta'eenu 'Alaa Umuuriddunya Wadden, Wassalaatu' Wassalaamu 'Ala Asyrafil Mursaleen, Sayyidina Muhammaddin, Wa'ala Aalihee Wasahbihee Ajma'een, Waba'du.

Alhamdulillah, syukur kehadiran Allah *Subhanahu Wata'ala* atas limpah rahmat-Nya mengizinkan kita hadir pada pagi ini bagi menyaksikan Upacara *Sovereign's Parade* Pengambilan Ke-19 Sekolah Pegawai Kadet Akademi Pertahanan Angkatan Bersenjata Diraja Brunei.

Beta dengan amat sukacita merakamkan ucapan setinggi-tinggi tahniah kepada 73 orang pegawai kadet yang telah berjaya menamatkan latihan dan juga telah mempamerkan penampilan perbarisan bermutu dan kemas sebentar tadi. Syabas Beta ucapkan kepada semua.

Demikian juga ucapan ini ditujukan kepada para ibubapa, penjaga dan keluarga di atas sokongan padu mereka di sepanjang pegawai-pegawai kadet ini mengikuti latihan.

Pada tahun 2020, Negara kita tidak terkecuali mengalami musibah pandemik *coronavirus*. Ianya telah menjejaskan aktiviti rutin termasuk pengendalian latihan tentera. Namun Alhamdulillah, latihan ketenteraan masih saja dapat berjalan walaupun dengan kaedah berbeza. Pembelajaran alternatif melalui teknologi telah berjaya dilaksanakan. Ini telah mengesahkan bahawa kursus-kursus dan lain-lain latihan boleh saja disampaikan melalui kaedah digital dengan berkesan.

Sehubungan itu, Angkatan Bersenjata Diraja Brunei wajarlah mengambil ingatan bahawa perkembangan teknologi adalah berupaya atau mampu untuk mengimbangi kekurangan tenaga kerja. Selain itu, aplikasi teknologi juga perlu diberi perhatian untuk meningkatkan kecekapan dan keberkesanan pengurusan pentadbiran dan kebolegunaan. Perkembangan teknologi juga berkait rapat dengan keupayaan siber yang merupakan cabaran baru bagi Angkatan Bersenjata Diraja Brunei untuk bagaimana menghadapi ancaman-ancaman yang berkaitan dengannya.

Kepada pegawai-pegawai kadet yang menamatkan latihan mereka pada pagi ini, Beta sekali lagi mengucapkan syabas di atas kecekalan dan semangat gigih awda menjalani kursus yang bermakna ini sehingga berjaya. Hari ini menandakan bermulanya kerjaya awda sebagai Pegawai Angkatan Bersenjata Diraja Brunei yang bertauliah. Sebagai pemimpin khususnya sebagai seorang pegawai muda memerlukan komitmen dan integriti yang tinggi selain sentiasa menjadi *role model* kepada yang dipimpin.

Sehubungan dengan itu, Beta ingin mengingatkan kepada semua agar sentiasa menjaga disiplin dan tahap profesionalisme masing-masing. Selain itu, Beta juga ingin mengingatkan supaya semua sentiasa memelihara pegangan kerohanian untuk mendapatkan rahmat dan perlindungan Allah *Subhanahu Wata'ala* daripada gejala-gejala buruk.

Alhamdulillah, Akademi Pertahanan Angkatan Bersenjata Diraja Brunei telah mencapai usianya 10 tahun pada 25 November 2020 yang baru lalu. Beta dimaklumkan sepanjang satu dekad kelahiran Akademi Pertahanan Angkatan Bersenjata Diraja Brunei telah berjaya mendidik seramai 2216 orang pegawai tentera dari dalam dan luar negara melalui beberapa kursus termasuk seramai 605 orang pegawai kadet.

Beta berbangga dengan transformasi Akademi Pertahanan Angkatan Bersenjata Diraja Brunei. Diantara perkembangannya yang ketara ialah mempunyai perkhemahannya sendiri, menjalin kolaborasi bersama institusi pengajian tinggi dari dalam dan luar negara dan mampu untuk menarik peserta kursus dari rantau dan antarabangsa. Ini termasuk pada akhir-akhir ini melahirkan *graduate diploma* dan juga Sarjana dalam Pengajian Pertahanan dan Keselamatan atau *Masters in Defence and Security Studies* melalui kolaborasi bersama Universiti Brunei Darussalam.

Beta terpanggil disini untuk merakamkan ucapan penghargaan dan terima kasih kepada seluruh warga Akademi Pertahanan yang merangkumi Pemangku Komandan, Pegawai Pemerintah, *Intake Commander, Colour Sergeant*, semua jurulatih dan staf Sekolah Pegawai Kadet atas segala dedikasi dan penat lelah mereka dalam melatih dan mendidik bakal-bakal Pegawai Angkatan Bersenjata Diraja Brunei dan menjayakan Upacara *Sovereign's Parade* pada pagi ini.

Beta berdoa semoga Allah *Subhanahu Wata'ala* akan memberkati segala pengorbanan mereka dengan mengurniakan ganjaran yang berlipat ganda.

Dengan lafaz *Bismillaahir Rahmaanir Raheem*, selawat dan salam ke atas junjungan besar kita Nabi Muhammad *Shallallahu 'Alaihi Wasallam*, maka Beta kurniakan tauliah sebagai Pegawai Angkatan Bersenjata Diraja Brunei kepada 73 pegawai kadet pengambilan ke-19.

Sekian, *Wabillahit Taufeq Walhidayah, Wassalamu 'Alaikum Warahmatullahi Wabarakatuh*.